

50 lět Serbska rejowanska skupina "Smjerdžaca" z.t.

Dny budu krótsje, lisćo so pomaťku na šćežkach kopoli a tón abo tamny měni, zo je lěto 2014 swoje wjerški hižo dožiwiło. Za Smjerdžečanskich rejowarjow so lětuši wjeršk hišće bliži. Na wulkotny festiwal na Acorach w awgusće wědza so rejowarjo jara derje dopomnić. Wjeršk pak je za nich bjez dwěla poľstalětny jubilej, kiž woswjeća ze swjedženskim programom dnja 18. oktobra w Chróšćan "Jednoće".

Ale kak so přihotuja na tajki wažny podawk? Nětko, krótko do toho, su proby bjez dwěla jara intensiwnje, wšako ma program sedžeć. Hižo spočatk lěta podachu so młodzi rejowarjo dwójce na treningowe lěhwo do Českeje. Z doľholětnym choreografom a baletowym mištrom Dieterom Wendišom nazwučowachu nowe reje a polěpšichu stare choreografije.



W zymje staji so zakład za rejowansku sezonu w lěću. Štož so tam nazwučuje, so na jewišćach swěta a domizny pokaza. Wobchadna rěč je při tym stajnje serbska. Je to wažne za swójsku identifikaciju, wšako noša rejowarjo serbsku drastu, prezentuja naľožki a reje a při tym tež hišće serbuja. Njedawno móžeše so tež kanclerka Angela Merklowa wo tym přeswědčić a nawukny wot Smjerdžečanow postrow "Dobry wječor". Nic jenož kanclerka móžeše so lětsa wot kmanosćow rejowarjow přeswědčić, ale tež w Slepom na dudakowym festiwalu abo w Choćebuzu na měšćanskim

swjedženju zamóžachu ludźi zahorić. Wosebje napjaty je kóždolětny wustup na beneficnym koncerće we Łazku. Tam su wosebje wjele swójbnych a znatych mjez přihladowarjemi, wšako liči Łazk geografisce a wosebje emocionalnje k "dobrej stwě" rejowanskeje skupiny ze Smjerdžaceje.

Lětuša premjera cyłeho programa pokaza so na Budyskim nalěću. Při najlěpšim wjedrje pokazachu rejowarjo z poľnej paru, što su w zymje nazwučowali. Poľdrahodźinski program zhromadnje z folklornej skupinu "Sprjewjan" bě jara wotměnjacy a poradženy, štož hosćo ze synym přikleskom hódnoćichu.

Tež něhdyši rejowarjo přihotuja so swěrnje na program a nowe a tež stare reje nazwučuja. Dohromady budu so někak 80 rejowarjow na programje wobdžělic. Měryjene na ličbje rejowarjow, kiž su hdy hižo za rejowansku skupinu rejowali, je to jenož maľki podžěl. Z chronikow a wobdžěleńskich lisćinow, kaž na přikład za kóždolětne treningowe lěhwa, su ličby něhdyšich rejowarjow wuwidzomne. Potajkim měješe rejowanska skupina "Smjerdžaca" dohromady 350 aktiwnych rejowarjow. Mnozy z nich so rady na čas w rejowanskej skupinje dopomnja. Njezapomnite wokomiki na festiwalach w cyłym swěće a wězo tež wustupy před domjacym publikumom wostanu w pomjatku. Ale tež přećelstwa, kiž so w rejowanskej skupinje mjez rejowarjemi wuwija, so doľho po aktiwnym času pěstuja.



Přejemy Smjerdžečanam tež za přichodne 50 lět dobre přećelstwa a zo dale ze samsnej zahoritostću přez jewišćo rejuja, nowe kraje zeznaja a so poľnje nowych nazhonjenjow nawróća.
Stefan Cuška